

LITERATURA. Antton Valverde kantariaren kontzertu labur batekin amaituko da ekitaldia

Juan Mari Lekuona omenduko dute gaur, adiskide giroan, Oiartzunen


Hari buruzko mahai-ingurua egingo dute, eta baita 'Egan'-en ale berria aurkeztu ere

Arantxa Elizegi | DONOSTIA

Lan handia egin du Juan Mari Lekuonak euskara eta literaturaren alde; horregatik, gaur Oiartzunen omenaldi berezia egingo diote 20:00etan. Helburu berarekin, aurtengo maiatzean, Lekuonaren lanari buruzko hainbat hitzaldi antolatu ziren Koldo Mitxelena kulturunean; bertan, Euskal Herriko pertsonaia ezagun askok hartu zuten parte: Patxi Ezkiaga, Anjel Lertxundi, Jose Luis Padron eta Pello Otxotekok, besteak beste. Hori guztia Antton Valverdek eskainitako kantaldi batekin amaitu zen.

Oraingo honetan ere, maiatzean hitzaldietan parte hartu zuten hainbat lagun izango dira omenaldian.

Ilunabarreko zortzietan hasiko dira ekitaldiak, eta Joxe Mari Urkia Euskalerriaren Adiskideen Elkarteko lehendakariak eskainiko du sarrera hitzaldia. Jarraian *Egan* literatur aldizkariaren ale berria aurkeztuko dute. Bertan, maiatzean Lekuonari buruz eskainitako hitzaldiak osorik irakurri ahal izango dira. Horietaz gain, Iñaki Zubeldiak Lehen Hezkuntzan egiten den hizkuntzaren irakaskuntzari bu-



IMANOL OTEGI / ARGAZKI PRESS

Juan Mari Lekuona poeta, Euskaltzaindiaren Donostiako egoitzan.

ruz eta irakurtzeko zaletasunari buruz idatzitakoak eta Miguel Delibesek idatzi eta Nere Mujikak itzulitako *Gaztelak dio* testua ere aurki daitezke.

Xabier Lete, hizlarien artean

Aurkezpen ekitaldiak amaitu ostean, *Juan Mari Lekuona, jakit*

turia herrikoiairen adierazpen kultura gaiaren inguruko mahai-ingurua egingo dute. Bertan, Xabier Lete abeslariak, Patxi Ezkiagak eta Mirari Garcia idazleak hartuko dute parte. Aurkezpen lanak, berriz, Jose Luis Padron poeta eta idazlearen esku utziko dituzte.

Azkenik, maiatzeko ekitaldietan gertatu bezala, Antton Valverde abeslariak kantaldia eskainiko du.

Ekitaldi horiekin guztiekin, antolatzaileek Juan Mari Lekuonak egindako bide poetiko luze eta emankorrari nolabaite-

ko saria eman nahi izan diote. Horregatik, hain zuzen ere, omenaldia idazlearen jaioterrian antolatu dute.

Lau poema liburu kaleratu ditu Oiartzungo poetak orain arte: *Mindura gaur*, *Muga beroak*, *Ilargiaren eskolan* eta *Mimodramak eta ikonoak*. Liburu horietan denbora luzez pentsatu eta landutako poesia dago, herri tradizioa eta joera berriak elkartzen dituen. Azken lana duela hamaika urte argitaratu zuen. Lekuonaren poema guztiak bildurik aurki daitezke *Ibilaldia* liburuan (EHU, 1996).

ANTZERKIA

Bilboko Ayala antzokia zinema areto bihurtuko da datorren astean

Erredakzioa | BILBO

Ayala antzokiak antzezleku izateari utziko dio, eta Bilboko 36. zinema gela izango da. Datorren igandean izango da azken antzerki emanaldia, eta hilaren 20an botako dute lehen filma.

60 urte baino gehiagotik hona martxan den antzokian, 48 ikuskizun, 322 errepresentazio eta 56.569 ikusle izan dira aurretan. Iazko azarotik EA-En dagoen antzoki pribatu bakarra da Ayala, eta Javier Ugalde bertako zuzendariak 300.000 euro eskatu zizkien erakunde-ek, emanaldiekin jarraitu ahal izateko; berari kostatzen zaionaren %25, hain zuzen. Ez zuen eskatutako laguntza lortu, eta orain zinema areto bihurtuko da Ayala.

Ugalderen esanetan, Ayalaren itxtearekin, «antzerkia amaituko da Bilbon».

MUSIKA

Euskal kantutegiaz jardunaldiak hasiko dira gaur Donostian

Erredakzioa | DONOSTIA

Gaur, Euskal kantutegiari buruzko jardunaldiak egingo dira Donostian, Eusko Ikaskuntzaren musika sailak Donostiako Musikene zentroarekin elkarlanean antolatuta. Miramar jauregian izango dira, hainbat adituren parte-hartzearekin.

Jardunaldiak lau atal izango ditu. Lehen atalean, *Euskal kantutegiaren proiektua* eta *Azterketa tekniko-musikala* landuko dira. Bigarrenetan, *Argitaratu gabeko musika kantutegiak* eta *Musika tradizionalen grabazioak*. Hirugarrenetan, *Kantutegien erabilera* eta *aplikazioak* eta *Euskal kantutegiak* eta *gaur egungo musika herrikoia* izango dira mintzagai. Eta laugarrenetan, *Kantutegiak* eta *etorkizuneko ikuspegiak* eta *Hezkuntza musika* landuko dituzte.

ANDOAIN ANARI

abeslaria




**ABENDUAK 13 - ORDUA: 20:00
LA SALLE ANTZOKIAN**

Antolatzailea: ANDOAINGO UDALA. Urigain Kultura Etxea
Laguntzailea: Gipuzkoako Foru Aldundia

OIARTZUN

BENITO LERTXUNDI



**Abenduak 14
larunbata
Gaueko 10:00etan
Madalensoron**

Laguntzaileak:



**Oiartzungo
Udala**

**GERNIKA DEIALDIAREKIN
BATEGINEZ**